

《邶風·燕燕》

《毛詩序》：

《燕燕》。衛莊姜送歸妾也。

原文：

燕燕于飛。差池其羽。
之子于歸。遠送于野。
瞻望弗及。泣涕如雨。

燕燕于飛。頡之頡之。
之子于歸。遠于將之。
瞻望弗及。佇立以泣。

燕燕于飛。下上其音。
之子于歸。遠送于南。
瞻望弗及。實勞我心。

仲氏任只。其心塞淵。
終溫且惠。淑慎其身。
先君之思。以勗寡人。

燕燕 四章 章六句